

खास-खास खबरां

1. संसद दा बजट सत्र राष्ट्रपति द्रौपदी मुरमू हुंदे दौने सदनें दी संयुक्त बैठक गी सम्बोधित करने दे कन्नै शुरु होआ।
2. महाराष्ट्र दे उपमुख्यमंत्री अजित पवार हुंदा बारामती च विमान हादसे च निधन होई गया। राष्ट्रपति- उपराष्ट्रपति- प्रधानमंत्री ते अन्य वरिष्ठ नेताएं उन्दे निधन पर शोक व्यक्त कीता ऐ।
3. प्रधानमंत्री नरेन्द्र मोदी होर नमीं दिल्ली च आयोजित सालाना NCC PM रैली च शामिल होए।
4. अमरीकी बपार प्रतिनिधि नै आखेया ऐ जे भारत-यूरोपी संघ मुक्त बपार समझोता वैश्विक बपार परिदृश्य च बदलाव गितै नमीं दिल्ली गी मजबूत स्थिति च रखदा ऐ।
5. बच्चें ते युवाएं लेई स्माईल इंटरनेशनल फिल्म फेस्टिवल दा 12मां संस्करण नमीं दिल्ली च शुरु होआ।
6. ते मौसम विभाग नै कल तोड़ी दिल्ली- हरियाणा- पंजाब- चंपीगढ़- हिमाचल प्रदेश- उत्तर प्रदेश- मध्य प्रदेश- राजस्थान ते बिहार च घने कोहरे दा पूर्वानुमान लाया ऐ।

<><><><><><>

Budget Session

राष्ट्रपति द्रौपदी मुरमू हुंदे संसद दे दवै सदनें गी इकठ्ठे सम्बोधन कन्नै अज्ज संसद दा बजट सत्र शुरु होआ। अपने भाषण च राष्ट्रपति होरें भारत दे विकास गी पक्का करने दे धेइए कन्नै मित्थी गेदी स्कीमें ते पहलकदमियें पर लौंs पाई। मुख्य उपलब्धियें गी उजागर करदे होई राष्ट्रपति होरें कश्मीर गी देश दे बाकी हिस्सें कन्नै जोड़ने आली “वंदे भारत एक्सप्रेस” दी शुरु कन्नै- जम्मू-कश्मीर च सम्पर्क सुधार दा जिक्र किता। उनें दुनिया दे सब्बनें शा उच्चे रेलवे पुल-चिनाब पुल दे पूरा होने पर बी लौंs पाई ते इसी भारत ते जम्मू-कश्मीर आस्तै ढांचागत विकास च ऐतिहासिक ते मील दा पत्थर आकखेया। आर्थिक सर्वेक्षण कल पेश किता जाग ते केन्द्री बजट ऐतवारे यानि इक फरवरी गी पेश कीता जाग।

राष्ट्रपति द्रौपदी मुरमू होरें आकखेया ऐ जे सरकार सेही मायनें च समाजिक न्याय आस्तै वचनेबज्झी दी ऐ। उनें आखेया “सबका साथ-सबका विकास” दा धेइया देश दे बसनीकें दी जिंदगियें च सकारात्मक बदलाव आना रदा ऐ। ग्राएं थाहरें च रोजगार ते विकास आस्तै- इक नमां कानून विकसित भारत जी राम जी बनाया गया ऐ। राष्ट्रपति होरें आखेया जे ए स्कीम ग्राएं च विकास गी तेज रफ्तार देग ते करसानें- जानवर पालने आले करसानें ते मछेरें आस्तै नमीं सुविधां उपलब्ध करवाग। उनें आखेया जे पिच्छले 10-11 बरें च भारत नै हर क्षेत्र च अपनी साख मजबूत कीती ऐ ते ए बरा 2026 विकसित भारत दी बक्खी सफर आस्तै इक मजबूत आधार ऐ।

<><><><><><>

Ajit Pawar Plane Crash

महाराष्ट्र दे उपमुख्यमंत्री अजीत पवार हुंदा अज्ज बड्डलै महाराष्ट्र दे बारामती च विमान हादसे च निधन होई गया। नागरिक उड्डयन मंत्रालय नै दस्सेया जे VSR आसेया संचालित इक Lear Jet 45 जहाज अज्ज बड्डलै बारामती हवाई अड्डे पर हादसे दा शकार होई गया। मंत्रालय नै दस्सेया जे जहाज च महाराष्ट्र दे उपमुख्यमंत्री सनें 5 लोक सवार हे- जिंदे च 2 होरनें कर्मचारी ते 2 चालक

दल दे सदस्य बी शामिल हे। अधिकारियें दस्सेया जे हादसे च कोई जीवित नई बचेया। मती जानकारी गी बलगेया जा रदा ऐ।

<><><><><><>

Condolence

राष्ट्रपति द्रौपदी मुर्मू-उपराष्ट्रपति सी.पी. राधाकृष्णन- प्रधानमंत्री नरेन्द्र मोदी- लोकसभा अध्यक्ष ओम बिरला- गृहमंत्री अमित शाह- रक्षामंत्री राजनाथ सिंह ते सूचना प्रसारण मंत्री अश्विनी वैष्णव होरें महाराष्ट्र दे उपमुख्यमंत्री अजीत पवार हुंदे असामयिक निधन पर गैहरा शोक व्यक्त कीता ऐ। महाराष्ट्र दे उपमुख्यमंत्री अजीत पवार हुंदे निधन पर राजनीतिक जगत च शोक संवेदनां व्यक्त कीती जा रदी ऐ। महाराष्ट्र ते गुजरात दे राज्यपाल आचार्य देवव्रत होरें अजित पवार दे असामयिक निधन पर गैहरा दुख व्यक्त कीता ऐ ते उन्दे परोआर दे प्रति गैहरी संवेदना व्यक्त कीती ऐ। महाराष्ट्र दे मुख्यमंत्री Devendra फडनविस होरें आखेया जे उपमुख्यमंत्री अजीत पवार महाराष्ट्र दी समस्याएं दी गैहरी समझ रखने आहलें जन नेता हे ते आम जनता च उन्दा अपार विश्वास हा। उन्दे निधन दे मगरा अज्ज राज्य भर च सरकारी छुट्टी घोषित कीती गई ते त्रै दिने दा राजकीय शोक मनाया जाग।

<><><><><><>

Plane Crash Investigation

महाराष्ट्र दे उपमुख्यमंत्री अजीत पवार ते 4 होरनें लोकें दी ब्हाई जहाज हादसे च मारे जाने दी घटना दी जांच एयरक्राफ्ट एक्सीडेंट इन्वेस्टिगेश ब्यूरो AAIB करोग। ब्यूरो दे महानिदेशक जांच लेई हादसे आली थाहरै पर पुज्जी गेदे न। सिविल हवाबाजी मंत्रालय दे सूत्रें जानकारी दिती ऐ जे जांच ब्यूरो दी टीम दिल्ली थमां पुणे पुज्जी ते उत्थुआं बारामती जाइयै हादसे दे कारणें दी जांच करे करदी ऐ। मंत्रालय नै दस्सेया ऐ जे एह जहाज- जेहदे च अजीत पवार सोआर हे- नै बड्डलै 8 बज्जियै 18 मिन्टें पर बारामती थमां पैहला राबता कीता ते उन्नै ब्हाई अड्डे दे रनवे 11 पर उतरने दी खीरी तयारी दी सूचना दिती पर रनवे नै लब्बने कारण पैहली कोशश च ओ उतरने दे बजाए परतियै उप्पर होई गया। ओहदे बाद 8 बज्जियै 43 मिन्टें पर उसी परतियै उतरने दी इजाजत दिती गई पर फही बी ओ नै उतरी सकेया ते उस्सलै कोई इक मिनट मगरा ATC नै रनवे नम्बर 11 पर अग्ग दे भांबड दिक्खे ते इमरजेंसी सेवाएं उत बक्खी मदद लेई नस्से।

<><><><><><>

PM -NCC Rally

प्रधानमंत्री नरेन्द्र मोदी होरें अज्ज नमीं दिल्ली दे करियप्पा परेड ग्राउंड आयोजित सालाना NCC PM रैली च शामिल होए। इस बरे दी रैली दा विषय ऐ-राष्ट्र प्रथम- कर्तव्य निश्ठा युवा- एह रैली इक महीने तोड़ी चलने आहली NCC गणतंत्र दिवस शिविर 2026 दा भव्य समापन होआ। एदे च देश भर थमां 2 जहार 4 सौ 6 NCC कैडेट शामिल होए-जिंदे च 898 महिला कैडेट बी शामिल हियां। रैली च 21 देशें दे कुल 207 युवा ते अधिकारी शामिल होआ रदे न। रक्षा मंत्री राजनाथ सिंह होर बी इस मौके पर उत्थे मजूद हे।

<><><><><><>

FTA

भारत ते यूरोपीय संघ आसेया भारत-यूरोपीय संघ मुक्त बपार समझौतें गी अखीरी रुप दिते जाने दे इक दिन बाद- अमरीकी बपार प्रतिनिधि जैमीसन ग्रीर होरें आखेया जे एह ऐतिहासिक मुक्त बपार समझौता अमरीका दे नमें आर्थिक दृष्टिकोण थमां प्रेरित बदलदे वैश्विक बपार परिदृश्य भारत गी मजबूत स्थिति च रखदा ऐ। इक निजी मीडिया गी दिते गेदे साक्षात्कार श्री ग्रीर होरें आखेया जे प्रमुख अर्थबवस्थाएं- विशेष रुपै नै यूरोपीय संघ- हुन वैकल्पिक निर्यात स्थलें दी

तपाश करा रदी ऐ कीजे अमरीकी बजार तोड़ी पुज्ज समीति होआ रदी ऐ। उनें आखेया जे यूरोपीय संघ अपने बपार प्रवाह गी बनाए रखने लेई भारत बकखी रुख करा रदा ऐ। श्री ग्रीर होरें आखेया जे श्री ग्रीर होरें आखेया जे घट्ट लागत आहले श्रम सनें अपने प्रतिस्पर्धा लाने करी भारत गी एदा लाऽ ठुआने दी बेहतर स्थिति हासल ऐ ते ओ इस समझौते गी अगगे बदाई सकदे न।

<><><><><><>

FTA Coverage

भारत -यूरोपीय संघ मुक्त बपार समझौते FTA दी घोषणा गी प्रमुख अंतराष्ट्रीय मीडिया संस्थानें च व्यापक ते प्रमुख कवरेज थोई ऐ जेदे च इसी ऐतिहासिक ते सर्वोत्कृष्ट बपार समझौता दसेया गया ऐ। कवरेज च समझौते दे महत्व गी हाल दे बरे दे सब्भनें महत्वपूर्ण वैश्विक बपार समझौतें चा इक दे रुप च उजागर कीता गया ऐ। यूरोप- संयुक्त राज्य अमरीका ते बृहपक्षीय मंचें दे प्रमुख अंतराष्ट्रीय प्रकाशनें नै भारत-यूरोपीय संघ मुक्त बपार समझौतें गी वैश्विक आर्थिक कूटनीतिक च इक निर्णायक क्षण दसेया ऐ।

<><><><><><>

PM Ayush

प्रधानमंत्री नरेन्द्र मोदी होरें अज्ज आखेया ऐ जे समग्र सेहत सेवा प्रदान करने आस्तै देश च तकरीबन 12 जहार आयुष सेहत ते आरोग्य केन्द्र स्थापित कीते गेदे न। केरल च आर्य वैद्यशाला चैरिटेबल अस्पताल दे शताब्दी समारोह गी वर्चुएल ढंगे सम्बोधित करदे होई श्री मोदी होरें आखेया जे 125 बरे दी अपनी यात्रा च इस संस्थान नै इलाज दी इक मजबूत प्रणाली दे रुप च आर्युर्वेद गी स्थापित कीता ऐ। उनें आखेया जे वैद्य अस्पताल इलाज दे जरिए अपनी सेवा देआ रदा ऐ ते अपनी स्थापना दे मगरा गै लगातार लोकें दी बीमारियें दा इलाज करा रदा ऐ। मोदी होरें आर्य वैद्यशाला दे संस्थापक- वैद्यरत्नम पी.एस. वेरियर हुंदे योगदाने गी चेता कीता। उनें आखेया जे आर्युर्वेद आस्तै उन्दा नजरिया ते लोकें दे कल्याण बकखी उन्दा समर्पण नागरिकें गी प्रेरित करदा रौहग। उनें आर्युर्वेद दी भूमिका ते योगदान दी सराहना कीती।

<><><><><><>

Smile Festival

स्माईल फाउंडेशन आसेया आयोजित स्माईल इंटरनैशनल फिल्म फेस्टिवल फॉर चिलड्रन एंड यूथ दा 12मां संस्करण अज्ज नमीं दिल्ली च शुरु होई गया ऐ। 7 दिन दे एह काजक्रम दिव्यांगजन सशक्तीकरण विभाग दे सहयोग कन्ने आयोजित कीता जा रदा ऐ। दिव्यांगजन सशक्तीकरण विभाग दी संयुक्त सचिव मनमीत कौर नंदा होरें आखेया जे फिल्म संचार दे शक्तीशाली साधन ऐ। उनें दसेया जे इस बरे पैहली बार फिल्म महोत्सव च दिव्यांग समावेशन- समानता ते विविधता जनेह विशे शामिल किते गे न ते केंई फिल्मां दिव्यांग बच्चें आसेया स्वयं निर्मित कीती गई ऐ। एह कारजक्रम यूक्रेन- निदरलैंड- फिनलैंड- चेक गणराज्य- लिथुआनिया- साइप्रस-एस्टोनिया दे दूतावास पोलिश संस्थान ते इतालवी सांस्कृतिक केन्द्र दे सहयोग कन्ने कीता जा रदा ऐ।

<><><><><><>

IMD

मौसम विभाग नै कल्लै तगर दिल्ली, हरियाणा, पंजाब, चंडीगढ़, हिमाचल प्रदेश, उत्तर प्रदेश, मध्य प्रदेश, राजस्थान ते बिहार च घना कोहरा छाए रौहने दा अनुमान लाया ऐ। हिमाचल प्रदेश, पंजाब, चंडीगढ़, हरियाणा ते दिल्ली च अगले दो सोयां त्रै दिनें तक सीतक लैहर चलने दी संभावना ऐ। उप-हिमालयी पश्चिम बंगाल ते सिक्किम च गरज ते एन गडा पौने दी पेशगोई कीती गई ऐ। उत्तराखंड, बिहार, पूर्वी उत्तर प्रदेश, छत्तीसगढ़ ते पूर्वी मध्य प्रदेश च बिजली कड़कने ते तेज हवाएं

कन्नै गरज दे कन्नै वरखा होग। विभाग मूजब, मन्नार दी खाड़ी ते कोमोरिन क्षेत्र च शुक्रवारे तकर तूफानी मौसम रौहने दे आसार न।

<><><><><><>

Naidu Manufacturing

केन्द्रीय नागर विमानन मंत्री राम मोहन नायडू किंजरापु होंरें आखेया जे केन्द्र सरकार देश च विनिर्माण पारिस्थितिकी तंत्र दे विकास पर मता ध्यान केन्द्रित करा रदी ऐ। हैदराबाद च अज्ज विंग इंडिया 2026 दा उदघाटन करदे होई उनें आखेया जे प्रधानमंत्री नरेन्द्र मोदी हुंदे नेतृत्व च सरकार आसेया शुरु किते गेदे सुधारें गितै लोकें गी हवाई यात्रा करने च सक्षम बनाया ऐ। उनें दस्सेया जे सरकार दा लक्ष देश च कोई 350 हवाई अड्डें दा निर्माण करना ऐ ते स्वदेशी विनिर्माण दे कन्नै होरनें नागर विमानन कम्पनियें गी बढ़ावा देने लेई विमानन पारिस्थितिकी तंत्र गी मजबूत करने दी दिशा च कम्म करा रदी ऐ।

<><><><><><>

Beating Retreat

77में गणतंत्र दिवस समारोह गी दर्शाने आला बीटिंग रिट्रीट समारोह कल नमीं दिल्ली दे विजय चौक च होग। इस समारोह च राष्ट्रपति द्रौपदी मुर्मू- उपराष्ट्रपति सी.पी. राधाकृष्णन- प्रधानमंत्री नरेन्द्र मोदी ते दुए केन्द्री मंत्री शामिल होगन। इस समारोह च भारती सेना- नौ-सेना- वायुसेना ते केन्द्री सशस्त्र बल दे बैंड अपनी पेशकशां पेश करगन। इस बरे विजय चौक पर बैठने आहली थाहरें दे नां भारती संगीत वाद्ययंत्रें दे नां पर रखे गे न। ए भारत दी समृद्ध सांस्कृतिक विरासत दा प्रतीक ऐ।

<><><><><><>

DDC

जम्मू-कश्मीर सरकार नै जिला विकास परिषदें दे मुख कार्यकारी अधिकारियें गी जानकारी दिती ऐ जे डी.डी.सी.एं दा कार्यकाल 24 फरवरी 2026 गी खत्म होआ रदा ऐ। ग्रामीण विकास ते पंचायती राज विभाग नै मुख कार्यकारी अधिकारियें गी निर्देश दिते न जे ओ अध्यक्षें ते सदस्यें गी कार्यकाल पूरे होने बारे अधिसूचित करन। संशोधित जम्मू-कश्मीर पंचायती राज कन्न हेठ 2021 गी स्थापित 20 जिला विकास परिषदें चा हर इक परिषद च 14 चुने गेदे सदस्य न। सारी परिषदें दे खत्म होने दे कन्नै जम्मू-कश्मीर च पंचायती राज दी त्रै स्तह आली बवस्था वजूद च नेही रौहग- जेड़ा के पंचायतें ते ब्लाक विकास परिषद दे खत्म होने दे बाद होआ रदा ऐ।

<><><><><><>